

Na osnovu člana 2.9 stav (1) tačka 17. Izbornog zakona Bosne i Hercegovine („Službeni glasnik BiH”, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20) Centralna izborna komisija BiH je na 71. sjednici, održanoj 28.10.2021. godine, donijela

ETIČKI KODEKS ORGANA ZA PROVOĐENJE IZBORA U BOSNI I HERCEGOVINI

Član 1 (Predmet)

Etički kodeks (u daljem tekstu: Kodeks) čini skup principa, standarda i pravila ponašanja članova, uposlenika Centralne izborne komisije BiH i drugih osoba angažiranih u organima za provedbu izbora u Bosni i Hercegovini.

Član 2 (Upotreba muškog i ženskog roda)

Svi izrazi koji se u ovom Kodeksu koriste za fizička lica u muškom rodu, obuhvataju iste izraze i za fizička lica u ženskom rodu.

Član 3 (Cilj)

- (1) Cilj Kodeksa je da promoviše ulogu i ugled organa za provođenje izbora u vršenju poslova iz njihove nadležnosti.
- (2) Kodeks sadrži odredbe o principima, standardima i pravilima ponašanja i obavezi upoznavanja sa sadržajem Kodeksa.
- (3) Odredbe Kodeksa se odnose na sve članove organa za provođenje izbora u smislu odredbi Izbornog zakona BiH.

Član 4 (Dužnosti članova organa za provođenje izbora)

- (1) U ostvarivanju principa Kodeksa, članovi organa za provođenje izbora dužni su da se ponašaju u skladu sa odredbama ovog Kodeksa, poduzimaju određene radnje i mjere, odnosno uzdržavaju se od onih radnji koje su zabranjene.

(2) Osim obaveza koje proizilaze iz zakona i drugih podzakonskih akata, članovi organa za sprovođenje izbora dužni su:

- a) savjesno, stručno i odgovorno obavljati dužnosti koje su im povjerene;
 - b) poslove vršiti čestito i efikasno prema profesionalnim standardima;
 - c) čuvati ugled organa kojeg predstavljaju;
 - d) strpljivo, pristojno i ljubazno s dužnom pažnjom i poštovanjem se ponašati prema građanima u ostvarivanju njihovih prava u toku izbornog dana i poštovati njihovu ličnost, dostojanstvo, jednakost i ravnopravnost;
 - e) biti ažurni, profesionalni i precizni u ispunjavanju zakonskih obaveza;
 - f) izgledati i odijevati se prikladno;
 - g) razvijati kolegijalne i korektne odnose prema drugim članovima organa za provođenje izbora.
- (3) Članovi organa za provođenje izbora treba da se s pažnjom dobrog domaćina staraju o efikasnom i ekonomičnom upravljanju i korištenju materijalnih i finansijskih sredstava koja su im povjerena u vršenju poslova, kao i da sprječavaju svako njihovo nezakonito raspolaganje.

Član 5

(Zabrane za članove organa za provođenje izbora)

Članovima organa za provođenje izbora nije dozvoljeno:

- a) koristiti imovinu organa za provođenje izbora u privatne svrhe;
- b) favorizovati pojedine kategorije građana u ostvarivanju njihovih prava zbog političke, nacionalne, rasne, vjerske, polne ili druge pripadnosti;
- c) davati izjave ili informacije koje bi štetile ugledu organa za provođenje izbora u toku izbornog procesa;
- d) zloupotrebjavati položaj u organima za provođenje izbora radi lične koristi ili koristi pojedine političke stranke ili kandidata;
- e) nanositi materijalnu štetu organima za provođenje izbora namjerno ili iz krajnje nepažnje ili podsticati druge da to čine;
- f) u službenim prostorijama i na biračkom mjestu unositi, posjedovati ili koristiti nedolična sredstva, opremu ili rekvizite.

Član 6
(Stupanje na snagu)

Ovaj Kodeks stupa na snagu osmog dana od dana objave u "Službenom glasniku BiH" a objaviće se u Sl. novinama FBiH, Sl. glasniku RS i Sl. glasniku Brčko distrikta BiH, te internet stranici Centralne izborne komisije BiH www.izbori.ba.

Broj: 05-1-02-3-1384-1/21

Sarajevo, 28.10.2021. godine

